



Institute for Democracy and Mediation
Instituti për Demokraci dhe Ndërmjetësim

With funding from
 Austrian
Development
Cooperation



Sondazhi i opinionit publik 2022: Besimi në qeverisje

Edicioni i 10^{të}

Autorë:

Irma Semini

Besjana Kuçi

Marsela Dauti

Koordinatorë e punës në terren:

Sheila Hafizi

© Maj 2023 nga Instituti për Demokraci dhe Ndërmjetësim. Të gjitha të drejtat janë të rezervuara.

Instituti për Demokraci dhe Ndërmjetësim (IDM)

Address: Rr. Shenasi Dishnica, Nd.35, H.1

1017 Tirana, Albania

E-mail: info@idmalbania.org

Website: www.idmalbania.org

Ky raport u përgatit në kuadër të Projektit “Konsolidimi i shërbimeve publike me në qendër qytetarin në Shqipëri” (CSDA), një fond i përbashkët donatorësh, që zbatohet nga qeveria shqiptare në partneritet me Programin e Zhvillimit të Kombeve të Bashkuara (UNDP) dhe me Bashkëpunimin Austriak për Zhvillim (ADC) si kontribuues kryesor, së bashku me UNDP-në. Përmbajtja e këtij raporti është përgjegjësi e autorëve dhe nuk përfaqëson domosdoshmërisht politikën ose qëndrimin zyrtar të qeverisë shqiptare, UNDP-së, apo ADC-së.

BESIMI NË QEVERISJE: PERCEPTIMET NDËR VITE

Sondazhi i Opinioneve Publik "Besimi në Qeverisje" vjen me edicionin e tij të dhjetë, i cili paraqet një përmbledhje të tendencave të rëndësishme që janë shfaqur gjatë periudhës 2013-2022 dhe analizën e të dhënave të vitit 2022. Duke analizuar të dhënat e agreguara ndër vite, synojmë të bëjmë të mundur paraqitjen e një panorame të plotë të evolucionit dinamik të aspekteve të ndryshme të qeverisjes në Shqipëri.

Perceptimet dhe qëndrimet e publikut për çështjet e trajtuara nga Sondazhi i Opinioneve Publik të vitit 2022 mund të jenë ndikuar nga faktorë të ndryshëm kontekstualë. Veçanërisht, vendimi i qeverisë për të kaluar të gjitha shërbimet publike online duke filluar nga 1 maji 2022 mund të ketë ndikuar ndjeshëm te perceptimet e qytetarëve për marrjen dhe dixhitalizimin e shërbimeve. Po ashtu, ndikim mund të kenë pasur edhe rastet e sulmeve kibernetike ndaj institucioneve qeveritare. Mund të ketë luajtur një rol edhe ndjekja penale e rasteve me akuzat ndaj zyrtarëve të lartë shtetërorë për abuzimin me pushtetin, korrupsion dhe pastrim parash. Nga ana tjetër, hapja e negociatave të anëtarësimit në BE për Shqipërinë mund të ketë ndikuar në perspektivat për qeverisjen, llogaridhënien dhe çështje të tjera të rëndësishme.

Gjetjet kryesore grupohen në tetë pjesë:

PJESA I – BESIMI NË INSTITUCIONE 2022

- Organizatat si NATO (74.2%), OKB (71.3%), dhe BE (70.9%) e ruajtën renditjen e tyre si institucionet më të besuara në Shqipëri.
- Institucionet fetare (64.2%) vazhdojnë të jenë institucionet shqiptare më të besuara, të ndjekura nga forcat e armatosura (59.5%), institucionet arsimore (54.5%) dhe organizatat e shoqërisë civile (53.6%).
- Partitë politike (29.5%), parlamenti (33.8%), prokuroria (35.2%) dhe gjykatat (36.2%) renditen si institucionet më pak të besuara për vitin 2022, edhe pse kanë shënuar një përmirësim krahasuar me vitin 2021. Besimi i publikut në gjykata është rritur me tetë pikë përqindjeje (pp) krahasuar me vitin 2021 (28%).
- Në vitin 2022, besimi i publikut te presidenti ka shënuar një rritje të konsiderueshme, në 41%, krahasuar me shifrat midis 24-28% gjatë viteve 2019-2021.
- Gjysma e të anketuarve kanë besim te Struktura e Posaçme Kundër Krimin të Organizuar dhe Korrupsionit (SPAK), e cila iu shtua listës së institucioneve të anketuara në vitin 2022. Kjo përqindje (50%) është më e lartë krahasuar me nivelet e besimit të raportuar për prokurorinë dhe gjykatat.
- Në vitin 2022, 35% e shqiptarëve besonin se reforma në drejtësi po zbatohet me korrektësi, njësoj si në vitin 2021 (35%). Gjithsesi, besimi i publikut se kjo reformë do të ndikojë pozitivisht në zhvillimin e vendit është ulur ndjeshëm vitin e fundit në 47%, një rënie prej 10 pp krahasuar me vitin 2021 (57%).
- Gjysma e shqiptarëve të anketuar (51.3%) e konsideronin televizionin si median më popullore, krahasuar me mediat sociale (30.6%) dhe portalet online (11.6%), duke konsoliduar kështu prirjen në rritje të televizionit si burimi kryesor për lajmet mbi aktualitetin gjatë dy viteve të fundit.

- 38.6% e të anketuarve besonin se informacioni i dhënë nga mediat shqiptare ishte i saktë/i vërtetë.
- Pak më shumë se gjysma e shqiptarëve (51.1%) raportuan se ishin të kënaqur ose shumë të kënaqur me ndikimin e ndihmës së huaj (me donatorët) në Shqipëri gjatë vitit 2022.

NDËR VITE

- Institucionet fetare janë perceptuar vazhdimisht nga të anketuarit si institucionet shqiptare më të besuara në vitet 2015-2022, besim që, gjithsesi ka pasur një tendencë në rënie.
- Partitë politike, gjykatat, prokuroria dhe parlamenti janë renditur ndër institucionet më pak të besuara gjatë këtyre viteve.
- Organizatat ndërkombëtare kanë qenë institucionet më të besuara në përgjithësi, vazhdimisht me mbi 70%, ndonëse shifrat kanë pësuar një rënie gjatë viteve 2019-2022.
- Besimi i publikut në zbatimin me korrektësi të reformës në drejtësi ka qenë i ulët gjatë viteve 2018-2020. Megjithatë, viti 2021 shënoi një pikë kthese, me një rritje prej 6 pp, rritje që vazhdoi në të njëjtin ritëm edhe në vitin 2022.

PJESA II – TRANSPARENCA DHE LLOGARIDHËNIA 2022

- Më shumë se gjysma e shqiptarëve të anketuar e konsideronin qeverinë qendrore (59.4%) dhe bashkinë (60.2%) si jotransparente.
- Pjesa më e madhe e popullsisë (65.3%) ishin në dijeni se ligji u garanton të drejtën e informimit, duke shënuar një rritje të lehtë në krahasim me vitin 2021 (62%).
- Shumica e shqiptarëve mendonin se si qeverisë qendrore, ashtu edhe qeverisjes vendore u mungon llogaridhënia. Perceptimi i llogaridhënies ishte i përafërt për të dy nivelet e qeverisjes: ku 36% e të anketuarve e konsideronin të përgjegjshme qeverisjen qendrore dhe 37.8% atë vendore.
- Organizatat ndërkombëtare (70.4%) mendohet se i kërkojnë llogari qeverisë më shumë se institucionet vendase të renditura në këtë sondazh ndonëse kanë pësuar një rënie prej 7 pp në krahasim me vitin 2021.
- Kontrolli i Lartë i Shtetit (KLSH) konsiderohet si institucioni vendas më efektiv në vend për kërkesën e llogarisë ndaj qeverisë (63.4%), i ndjekur nga parlamenti (58.4%) dhe media (55%), ndonëse secili me ulje të ndjeshme: KLSH (-8 pp), parlamenti (-6 pp) dhe media (-6,5 pp), krahasuar me vitin 2021.

NDËR VITE

- Më pak se gjysma e të anketuarve në vitet 2016-2022 e kanë konsideruar qeverisjen qendrore dhe atë vendore si transparente ose të përgjegjshme. Perceptimi publik si për transparencën ashtu edhe për llogaridhënien është luhatur në shifra të ngjashme.

- Që nga viti 2016, qeverisja vendore është vlerësuar vazhdimisht pak më e përgjegjshme se niveli qendror, me një mesatare prej 38% krahasuar me 35%. Gjithsesi, në vitin 2019 për nivelin vendor të qeverisjes është vënë re një rënie e ndjeshme me 7pp. Nga ana tjetër, qeveria qendrore perceptohet si më transparente, me një vlerësim mesatar prej 40% krahasuar me 37% për qeverisjen vendore. Gjithsesi, në rastin më të mirë shifrat mbeten nën 45%.
- Kontrolli i Lartë i Shtetit është evidentuar vazhdimisht si mekanizmi më efikas i llogaridhënies së brendshme (llogaridhënia horizontale) nga më shumë se gjysma e të anketuarve, me një mesatare prej 64% nga viti 2016 deri në vitin 2022. Pas tij vjen parlamenti me një mesatare prej 56% e të anketuarve.
- Organizatat ndërkombëtare janë konsideruar vazhdimisht nga shumica e të anketuarve (me një mesatare prej 73%) se i kërkojnë më shumë llogari qeverisë krahasuar me institucionet vendase gjatë viteve 2016-2022. Media është evidentuar vazhdimisht si mekanizmi më efikas i llogaridhënies vertikale në vend nga më shumë se gjysma e të anketuarve, me një vlerësim mesatar prej 59% për periudhën në fjalë.

PJESA III – KORRUPSIONI NË INSTITUCIONET PUBLIKE 2022

- Shumica e shqiptarëve (76.5%) e konsiderojnë korrupsionin e vogël (e nivelit të ulët) si të përhapur ose shumë të përhapur, krahasuar me 79.1% që kanë këtë mendim për korrupsionin e madh (e nivelit të lartë). Për të dy nivelet e korrupsionit, shifrat kanë pësuar rënie prej vitit 2021, veçanërisht për korrupsionin e nivelit të ulët (-6 pp nga 2021 dhe -10 pp nga 2019 dhe 2020).
- Plot 65.8% e shqiptarëve nuk kanë besim në ndjekjen penale të rasteve të korrupsionit të madh, ndërsa 56.9% nuk kanë besim në ndëshkimin efektiv të korrupsionit të vogël.
- Ndërkohë, 15.4% e shqiptarëve raportuan se kanë qenë dëshmitarë të rasteve të korrupsionit në nivel të qeverisjes qendrore dhe 21.6% në qeverisjen vendore.
- 32.7% e qytetarëve që kanë marrë shërbime nga qeverisja vendore në vitin 2022, raportuan se kishin paguar ryshfet një zyrtari publik të këtij niveli.
- 30.9% e qytetarëve që kanë marrë shërbime të qeverisë qendrore në vitin 2022, raportuan se kishin paguar ryshfet një zyrtari të këtij niveli.
- Për sa i përket arsyeve për dhënien e ryshfetit, 50.3% raportuan se u ishte kërkuar, 24.4% thanë se kanë paguar për të marrë shërbime më të mira herën tjetër, ndërsa 14.1% kanë paguar si mirënjohje për shërbimet e marra.
- Mes të anketuarve që kanë paguar ryshfet, vetëm 11.2% (N=64) e kanë raportuar atë tek autoritetet, që do të thotë 88.8% (N=508) nuk e kanë raportuar. Arsyet që u përmendën më shpesh për mos-raportim ishin: 37.4% e konsideronin ryshfetin si diçka e zakonshme, 32.1% e mendonin raportimin si të padobishëm dhe 12.3% kishin frikë nga pasojat e raportimit.

NDËR VITE

Përhapja e korrupsionit

- Në vitet 2019-2022, shumica dërrmuese e të anketuarve e konsideronin korrupsionin e madh dhe atë të vogël si “të përhapur ose shumë të përhapur”, me vlerësime që kalojnë nivelin e 75% të të anketuarve.
- Në vitin 2022 ka pasur një rënie të dukshme në perceptimin e korrupsionit të vogël, - 6 pp krahasuar me 2021 dhe -10 pp krahasuar me vitet 2019 dhe 2020.

Besimi në ndjekjen penale të korrupsionit

- Më pak se një e treta e të anketuarve kishin besim në ndjekjen penale të rasteve të korrupsionit të madh në vitet 2017-2022 (me 25%-32% të të anketuarve).
- Të anketuarit raportuan vazhdimisht besim më të madh në ndjekjen penale të rasteve të korrupsionit të vogël (41%) krahasuar me korrupsionin e madh për të njëjtën periudhë (32%). Pavarësisht luhatjeve ndër vite, besimi i të anketuarve në ndjekjen penale të korrupsionit të madh dhe atij të vogël është përmirësuar në përgjithësi, ndonëse me vlera të vogla.

PJESA IV – NDIKIMI I INTERESAVE POLITIKE 2022

- Gjykatat (41.8%) konsiderohen si institucionet më të ndikuara politikisht, edhe pse perceptohen si më pak të tilla krahasuar me një vit më parë (49% në 2021)..
- 37.9% e konsideronin SPAK-un ‘pak ose aspak të ndikuar’ nga interesat politike, ndërsa 31.8% e shqiptarëve e konsideronin atë si ‘shumë të ndikuar ose jashtëzakonisht të ndikuar’.
- Institucionet fetare shiheshin si institucionet më pak të ndikuara politikisht, ashtu si edhe në vitin 2021 (11%). Vetëm 12.4% e qytetarëve i konsiderojnë ato si ‘shumë ose jashtëzakonisht të ndikuara’.

NDËR VITE

- Perceptimi i publikut për institucionet që zakonisht konsiderohen si ‘shumë ose jashtëzakonisht të ndikuara’ nga politika është përmirësuar me kalimin e viteve, veçanërisht për gjykatat dhe prokurorinë.

PJESA V – PJESËMARRJA QYTETARE 2022

- Përqindja e shqiptarëve të interesuar për të marrë pjesë në vendimmarrje në vitin 2022 nuk ka ndryshuar shumë nga viti 2021 (45.3% kundrejt 43.5%).
- Në 2022, më pak qytetarë raportojnë se kanë pasur mundësi të mjaftueshme për të marrë pjesë në vendimmarrjen vendore (37.8%) në krahasim me nivelin qendror të qeverisjes (27.4%).
- Një pjesë relativisht e vogël e publikut (18.1%) raportoi se kishte përdorur portalin www.konsultimipublik.gov.al.
- Shumica dërrmuese e qytetarëve (73%) janë dakord me pohimin se kanë njohuri të mjaftueshme për të kuptuar nëse vendimet e qeverisë janë të mira apo të këqija.
- Më shumë se gjysma e shqiptarëve të anketuar (60.9%) besojnë se dëgjesat publike në nivel vendor janë ngjarje formale që kanë ndikim të kufizuar në vendimet e bashkisë, ndërkohë që vetëm 39.2% besojnë se sugjerimet e organizatave të shoqërisë civile dhe grupeve të interesit merren parasysh.
- 37.6% e të anketuarve janë dakord me pohimin se këshillat bashkiakë përfaqësojnë komunitetet vendore dhe 36.6% janë dakord se buxheti i bashkisë reflekton prioritetet e qytetarëve.
- Përqindja e popullsisë që ka marrë pjesë në një demonstratë/tubim apo që ka nënshkruar një peticion u rrit nga 27.1% në 2021 në 32.2% në 2022.
- 61.5% e qytetarëve ishin të gatshëm të angazhoheshin në punë vullnetare.
- Në vitin 2022, 38.3% e popullsisë në Shqipëri dëshiron të largohej drejt një shteti tjetër, përqindje pak më e ulët se ajo e vitit 2021 (41%).

NDËR VITE

- Në periudhën 2016-2022, përqindja e qytetarëve që raportuan se kishin mundësi të mjaftueshme për të marrë pjesë në proceset vendimmarrëse të qeverisjes qendrore dhe vendore është nën 40%. Që nga viti 2019, vihet re një stanjacion lidhur me mundësitë e perceptuara për pjesëmarrje në vendimmarrjen e të dy niveleve të qeverisjes.
- Mundësitë për të marrë pjesë në vendimmarrjen vendore shënuan rezultate më të larta, me një mesatare prej 37%, krahasuar me nivelin qendror, i cili kishte një mesatare prej 27% në vitet 2016-2022.
- Pjesëmarrja faktike në konsultimet publike shënon vlera më të ulëta, nën 25%, krahasuar me mundësitë e perceptuara përgjatë periudhës në fjalë.
- Arsyet kryesore që të anketuarit dhanë për mospjesëmarrjen në proceset e konsultimit në vitet 2016-2022 ishin mungesa e besimit se pjesëmarrja do të kishte ndikim, pritshmëria se duhet të merrnin pjesë njerëz të tjerë dhe besimi se nuk ekzistojnë mekanizma apo procese konsultimi.
- Vitet e fundit ka pasur një pjesëmarrje më të madhe në aktivizmin qytetar. Përqindja e shqiptarëve që raportuan se kanë marrë pjesë në tubime/demonstrata apo që kanë nënshkruar peticione u rrit pas

vitit 2020 dhe në vitin 2022 shifrat ishin 10 pp më të larta se në vitin 2016 (32% kundrejt 22%). Arsyet kryesore që u dhanë nga të anketuarit ishin interesat personale dhe interesat e përbashkëta të komunitetit ku jetojnë.

- 46% e shqiptarëve kanë dashur të largohen drejt një shteti tjetër në vitin 2019. Kjo shifër është ulur me 8 pp në vitin 2022 në 38%. Arsyet kryesore për dëshirën për t'u larguar drejt një shteti tjetër lidhen me mundësitë për një jetë më të mirë, me faktorët ekonomikë dhe zhvillimin profesional.

PJESA VI – KËNAQSHMËRIA ME OFRIMIN E SHËRBIMEVE PUBLIKE 2022

- Mesatarisht 39.1% ishin “të kënaqur” ose “shumë të kënaqur” me ofrimin e shërbimeve publike kryesore, nivele që janë të ngjashme me ato të vitit 2021.
- Në përgjithësi, nivelet e kënaqshmërisë me ofrimin e shërbimeve publike u ulën për pjesën më të madhe të shërbimeve publike bazë dhe ato administrative të matura në këtë sondazh, krahasuar me vitin 2021.
- Shërbimi i arsimit publik (46.4%), furnizimit me ujë të pijshëm (46.4%), pastrimit (46.2%) dhe ato të shëndetit publik (43.4%) janë raportuar më shpesh si të kënaqshme në krahasim me shërbimet e policisë (35.9%), transportit publik (31.8%) dhe shërbimet gjyqësore (25.8%), ndonëse shifrat kanë pësuar rënie. Konkretisht, kënaqshmëria e publikut me ofrimin e shërbimeve të arsimit publik dhe shërbimeve të emergjencave ka shënuar rënie të ndjeshme, - 7 pp për arsimin, -7 pp për shërbimin e urgjencës (ambulancat) dhe - 9 pp për zjarrfikësit, krahasuar me shifrat e vitit 2021.
- 56% e qytetarëve shqiptarë që kishin përdorur një shërbim administrativ në vitin 2022 ishin “të kënaqur” ose “shumë të kënaqur”, veçanërisht kur bëhej fjalë për gjendjen civile (52%), sigurimet shoqërore (39.4%) dhe transportin rrugor (38.5%). Gjithsesi, shifrat për shërbimet e gjendjes civile janë ulur ndjeshëm, me -8 pikë përqindjeje krahasuar me vitin 2021.
- Vetëm 13.4% e të anketuarve kanë dorëzuar një ankesë tek institucioni që ka dhënë shërbimin publik, përqindje e ngjashme me atë të raportuar në sondazhin e vitit 2021 (15.1%).
- Vetëm 9.5% e qytetarëve e kishin përdorur platformën online të bashkëqeverisjes www.shqipëriaqeduam.al për të bërë një ankesë. 31.8% e atyre që kanë bërë ankesë në këtë platformë thanë se ankesa ishte zgjidhur.
- 24.9% e qytetarëve besojnë se institucionet i trajtojnë siç duhet ankesat e qytetarëve.
- 59.3% e qytetarëve të anketuar nuk ndiheshin të sigurt në jetën e përditshme, duke shënuar një rënie të ndjeshme prej 12 pp, krahasuar me 71.6% në vitin 2021. Tre faktorët kryesorë që shkaktojnë ndjenjën e pasigurisë janë kriminaliteti, shëndetësia pa cilësi e standarde dhe pasiguria për vendin e punës.

NDËR VITE

- Mesatarisht, më pak se gjysma e të anketuarve kanë qenë “të kënaqur” ose “shumë të kënaqur” me ofrimin e shërbimeve bazë publike gjatë periudhës 2016-2022, duke mbetur brenda një intervali të ng-

jashëm në katër vitet e fundit (2019-2022), me vlerësime që luhaten në 38%-42%.

- Në vitet 2019-2022, përdoruesit e shërbimeve publike administrative kanë raportuar vlera shumë më të larta se niveli i përgjithshëm i kënaqshmërisë i raportuar nga të gjithë qytetarët e anketuar, duke arritur një nivel kënaqshmërie prej 56% në vitin 2022.

PJESA VII – PËRDORIMI I TEKNOLOGJISË SË INFORMACIONIT DHE KOMUNIKIMIT (TIK) 2022

- Pjesa më e madhe e publikut (64.9%) ishin të informuar se bashkia e tyre ka një faqe interneti, një përqindje dukshëm më e lartë se në vitin 2021 (59.7%), që tregon një prirje të përmirësimit të vazhdueshëm të këtij treguesi. 45.9% e qytetarëve kanë raportuar se e përdorin faqen e internetit të bashkisë, përqindje më e lartë krahasuar me vitin 2021 (40.7%).
- Shumica dërrmuese e të anketuarve (90.7%) raportuan se ishin në dijeni se administrata shtetërore ofron shërbime elektronike përmes portalit e-Albania. Ndër ta, për vitin 2022, 82.9% raportuan se marrin shërbime elektronike përmes portalit e-Albania.
- Më pak se gjysma e qytetarëve (47.9%) raportuan se i merrnin shërbimet në portalin e-Albania pa ndihmën e të tjerëve.
- Përqindja e qytetarëve që i cilësuan shërbimet e ofruara nga portali e-Albania si funksionale (-6.2 pp), të lehta për t'u përdorur (-9.7 pp) dhe që shkurtojnë kohë për marrjen e tyre (-4.2 pp) ishte më e ulët në 2022 sesa në 2021. 52.6% e të anketuarve ishin dakord se shërbimet elektronike u bëjnë të mundur qytetarëve të shprehin komente/sugjerime.
- Mbrojtja e të dhënave personale ishte e rëndësishme për shumicën dërrmuese të të anketuarve (90.3%). Megjithatë, më shumë se gjysma e tyre nuk besonin se të dhënat personale administroheshin siç duhet, qoftë nga aktorët publikë (59.8%), qoftë nga sektori privat (58.8%).

NDËR VITE

- Përqindja e qytetarëve që janë në dijeni se bashkia ku jetojnë ka një faqe interneti paraqet një tendencë dukshëm në rritje nga viti 2014 deri në vitin 2022. Megjithatë, përqindja e përdoruesve të faqes së internetit të bashkisë nuk është rritur me të njëjtin ritëm si ajo e atyre që janë në dijeni për të.
- Pjesa e të anketuarve që kanë dijeni për portalin e-Albania është rritur ndjeshëm që nga viti 2018 (54%), në 91% në 2022.
- Po kështu, përqindja e qytetarëve që kanë marrë shërbime elektronike nëpërmjet portalit e-Albania është rritur ndjeshëm nga 38% në 2019 në 75% në 2022.

PJESA VIII – PËRFSHIRJA GJINORE DHE SOCIALE 2022

- 61.5% e shqiptarëve ishte dakord se ka barazi midis burrave dhe grave, përqindje e ngjashme me atë të vitit 2021.
- Më shumë se tre të katërtat e shqiptarëve (77.1%) besojnë se burrat dhe gratë kanë akses të barabartë në shërbimet publike, që është pak më e lartë se vitin e kaluar.
- Shumica e qytetarëve (72.4%) në vitin 2022 besojnë se nëpunësit publikë i shërbejnë me të njëjtin përkushtim dhe etikë grave dhe burrave, përqindje më e ulët se në vitin 2021.
- Shumica dërrmuese e të anketuarve (77.5%) mendojnë se gratë dhe burrat janë njësoj të aftë për të mbajtur çdo post publik, përqindje më e ulët se në vitin 2021.
- Në vitin 2022, 14.6% e të anketuarve raportuan se ishin trajtuar ndryshe nga një institucion apo nëpunës publik për shkak të gjinisë, moshës, përkatësisë etnike, orientimit seksual, paaftësisë apo arsyeje tjetër, përqindje pak më e lartë se në vitin 2021 (11.8%).
- Pothuajse tre në pesë persona (58%) besonin se rritja e numrit të grave në këshillin bashkiak ka ndikim pozitiv në qeverisjen vendore, përqindje që është dukshëm më e ulët se në vitin 2021 (64%).

NDËR VITE

- Të dhënat në vite (2016-2022) tregojnë se përgjithësisht më shumë se gjysma e të anketuarve janë dakord se ka barazi mes burrave dhe grave në shoqëri. Burrat ishin më shumë të prirur në krahasim me gratë të ishin dakord se ka barazi gjinore, me një mesatare prej 61%, krahasuar me 50% për gratë.
- Pjesa më e madhe e të anketuarve besojnë se burrat dhe gratë kanë të njëjtën akses në shërbimet publike, pa dallime të konsiderueshme në perceptimet mes grave dhe burrave.
- Gjatë viteve 2016-2022, përqindja e të anketuarve që raportuan se ishin trajtuar ndryshe nga një institucion ose nëpunës publik për shkak të aftësisë së kufizuar, orientimit seksual, përkatësisë etnike, moshës, gjinisë ose për arsye të tjera nuk ka pasur ndonjë ndryshim të ndjeshëm. Vlerat varionin nga 12% në 16%.
- Përqindja e të anketuarve që janë dakord se gratë dhe burrat janë njësoj të aftë për të mbajtur poste publike ka mbetur dukshëm e lartë, me një mesatare prej 80%, që kur kjo pyetje u bë për herë të parë në vitin 2016. Vlerësimi më i ulët ishte 77% i vitit 2019.